

## YA:IMESIKONO LETA EBETE NANITABOKOBI MIDIPIATAMO OSIYODILIYA

<sup>1</sup> Na Ya:imesitela, Godoko ega:walo Kawodawa Ya:su Kelisoko ibino wokodawala. Ebema: Isalaela 12 gu magumulo la: piyate Yudiya opone maimiawete me opo kawonomolo iyaiya da:nilukuliawenama, la: niyaniyata, nale me leta la:tamo palibomo. \*

*Godoko Nanitabokobi Midi Tanalo Ega:walo  
Ebeno Mulo Tanalo*

<sup>2</sup> Naimano nanitabokobi midipi ekakiala:, iyaiya temeteme tanalo bilibilinomate la:tamo demaimiona, modobola la: kawonomamo nekalakalaonala:, \* <sup>3</sup> mabu la: iyatawalata kawokawo temeteme tanalate nanitabokobi mididawatamo da:pelaema:na:, ebe tanalodo ebete ebno nanitabokobi midi magumulo apete kodakodaloo kutitamene. \* <sup>4</sup> Ebema: la: kodakodaloo lamota:ona tanalo akoatepala:, mabu la: ma kunu eba ilukulinalo la:imano nanitabokobi midi magumulo elawoelawonomoma: keda:omamota, iyo, la:imano apepeo magumulo la:le wade tanalo kapiya idi akanaetoamidaema.

<sup>5</sup> Ebema: la: magumulo kebe lumagigodolo mulo woki itana:no, modobola ebete Godoko na:toweuemene, ebene Godote ebetamo mulo tanalo kikaemene. Nanitabola, Godote ebako toteomedawatamo ubia: tabo

\* <sup>1:1:</sup> Ma:t 13:55; Gal 1:19; Ali 15:23; 1Pit 1:1    \* <sup>1:2:</sup> Lom 5:3-5

\* <sup>1:3:</sup> 1Pit 1:7

a:kegeamene, mabu ebeno kalakala bitana epo bilibilinomatamo ebeno wadewade tanalo ikalamolema:. ☀ 6 Wiyasiya numa:la:, la: Godogodone tanalo idi laema: la:imano nanitabokobi midi magumulo woki netewama: eda:olo ebe akotoweoma:la:, mabu woki netewagodawano kimalagidilo tanalate ebe kewa: kolomono ulo keba kunula:ka: eba kunula, awate iyaiya apune dapalogonako ulate atumu iyaiya eba kunu kemaimioma:na:. 7 Ebako lumagite akomalagidilala: ebete Godoko toteome magumulo wade tanalo idi kelaemene, 8 ao, ebegodolo woki netewa ba:pola:na, ebema: ebeno osiyodilole tanalo bilibilinomo magumulo ebe nalegaona.

*Inamabua:dawa      Ega:walo      Inamabu  
Bilibila:godawa Ibino Tanalo*

9 Ebema: modobola nanitabokobi midipi magumulo inamabua:dawate nekalakalamene, mabu ebeno tepo magumulo Godote wadewade tanalamo ebe iyalo etabokaimiya, ega:walo walone ebete wade wiya kikaemene. 10 Ega:walo modobola inamabu bilibila:godawate atumu na:kekalakalamene, mabu Godote ebeno tepo magumuno nigologolo tanalo eba iyatumilo ebe ma kunu aniya, ebegodolo ditana ebe inamabu bilibili tanalo ebe kawo tanaloa:. Iyo, walone me opono inamabu bilibili tanalate kolopoligoma:na:, me opono kaiyakaiyate opamo ma:sigate alawoma: keba kunu keda:nakole eba kunu. ☀ 11 Iyo, nanitabola, egelate eba

---

⌚ 1:5: Mulo Tabo 2:3-6    ☀ 1:10: Ais 40:6-7

podololo enaenanomoma: deda:mene ebe tetelo kaiyakaiyate alawoma: eda:ote ibino wadewade tita:te gito kolopoligomene, ebema: inamabu bilibila:godawate eba kunu kowagelemene, ebete ebeno iyaiya mani woko eba osiyodilolelo ebeno igilote ebo kalatidimene.

*Kuba Gabamo Wabuga:ta Tanalate  
Godogodone Ka:pelamena:*

<sup>12</sup> Ebema: kebe nanitabokobi mididawate ka:wokawo temeteme magumulo kodakodanomolo dutinamene, modobola ebete nekalakalamene mabu ebete ebako wabudi magumulo kodakodama: deda:mene ebete uwomua: igilo wiya kelaemene. Numa:la:, me igilo ebe piyate Godoko nilakapolo demalagidilona ebete iba:tamo ikalaema: nanitabolo degiya ebe tanalola.

<sup>13</sup> Ega:walo me tanalo idila. Idawate iyaiya temeteme magumulo eba utinalo kuba gabamo wabuga:ta tanalote ebetamo da:pemene, ebete ma kunu akogeala: “Me kubate Godogodone natamo pe.” Ao, eba kunua:. Godote lumagi kuba gabamo kowabuga:tanakoa:, ega:walo Saitanakono elawo puliyala ebete ebeno kuba gabamo wabuga:ta tanalo Godotamo kosiyodiloma:. <sup>14</sup> Ebema: numa:la:, kuba gabamo wabuga:ta tanalate lumagino kateneno kubakuba ubi gabodo pelamenaka, iyo, me gabodo Saitanate ebe anamiyatate ebeno gubi magumamo gito ka:neba:idilomene. <sup>15</sup> Ebe tetelo ebe lumagino tepo magumulo kateneno kuba ubi tanalote apete kuba osiyodilo tanalo kalaimene, ebene ebeno kuba osiyodilo tanalote ebeno okoli

magumulo kawonomoma: deda:mene, ebete a:e  
ebo kalaime mabu kuba osiyodilo tanalono  
wiya ebe a:ela.

<sup>16</sup> Ebema: naimano wadewade nanitabokobi  
midipi ekakiala:, la: a:ka:tuwa: la: a:da:  
akomasigila:la:, <sup>17</sup> mabu wadewade tanalo  
bilibilinomate Unu Duliymolono Nabiwigodone  
ebeno nilakapolo atamo pelamena, wiyasiya  
kuba tanalate ebegodone ka:pelamena:. Ebe  
tobolo unu da:pukuimina ebe maweleno  
Nanutudawala ega:walo ebe nanitabo nilakapo  
Kawodawanomola, ebema: ebeno nilakapo  
tanalote atamo iyama: keda:na:, ma kunu  
tete idilo kawonomamo kawokalimi, tete  
idilo kela:mo kawokalimi, ebete eba kunu  
kowagelena:. <sup>18</sup> Numala:, ebete a ebeno  
gudima: ka:midima: ebeno ubi iyatiya, ale  
ebeno Nani Tabo magumudo oliolinoma:  
eda:ote kawokalaoma:. Ebema: me tanalo ebe  
nanitabonomola, ebete me opono inamabu  
bilibilinomo dosiyodiloliya, ibi magumulo a ebe  
dopo nolo da:imi keba kunula:ka: eba kunula. <sup>◊</sup>

*Modobo: Lumagite Godokono Tabo  
Gito Olowima:, Modobola Ebete Nanitabolo  
Na:tuduwatamene*

<sup>19</sup> Naimano wadewade ekakiala:, modobola la:  
me tanalo nemalagidilala:. Modobo: lumagite  
epetapino tabo olowioa:no ebe a:ka:tuwa:  
ebeno tanalo samamo kiyawaoma:, ega:walo  
modobo: lumagi idite lumagi iditamo samamo  
dowama:, <sup>20</sup> mabu Godokono tuputupu okoli  
tanalonon da:ima:te lumagino dowa gabodo

---

<sup>◊</sup> **1:18:** Yon 1:13

a:ka:noloma:na:.      <sup>◊</sup>      21 Ebema: la:imano  
 tepo magumulo da:pola:na ebe iyaiya daley  
 wokino tanalo, ega:walo la:imano apa:mo  
 dosiyodilola:wenakoma ebe kuba osiyodilole  
 tanalo, modobola la: ebe tanalo bilibilinomo  
 balamo alomawete, ebene Godote la:imano tepo  
 magumamo damionako ebe tabamo nanitabolo  
 na:tudila:onala:, mabu ebe tabote la:imano igilo  
 mula:no gaboma: eda:na. <sup>◊</sup>

22 Numa:la:, la: Godokono tabo olowiawete  
 tudila:oa:no, me gabodo la: a:ka:tuwa: la:  
 masigilinakomata. Ebema: modobola la: ebeno  
 tabo olowiawete nanitabolo na:tudila:onala:, <sup>◊</sup>  
 23 mabu kebe lumagite Godokono tabo olowite  
 tuduwata:no, ebe poteleka: galasilo ebeno  
 ololo daedale wokilo dumita ebe lumagi keba  
 kunula:ka: eba kunula. 24 Eiye! Ebako lumagite  
 ebeno olololo kuba idi duimene, ebete ebe tanalo  
 modobokobi midia:no, tote beda: kuba tanalo  
 kumile ebe tanalo gito ka:na:dodomatimene.  
 25 Wiyasiya kebe lumagite Godokono Wade  
 Totomu Tabonomo wadenomamo umite  
 kalakalago eba lawelo, ebete ebe tabamo  
 tuduwatake dodomatia:no ebe tanalo magumulo  
 dokolinamene, Godote ebeno osiyodilole tanalo  
 bilibilinomo magumulo ebe wadenomamo  
 bowalubinakomene. Nanitabola, Godokono  
 Wade Tabonomote ebako lumagi ebeno  
 nanitabokobi midi magumulo tutunomoma:  
 ka:midimene. <sup>◊</sup>

### *Nanitabo Gabodo Godoko Waloma:ta Tanalo*

---

<sup>◊</sup> 1:20: Igilo 7:9    <sup>◊</sup> 1:21: Kol 3:8; 1Pit 2:1    <sup>◊</sup> 1:22: Ma:t 7:26;  
 Lom 2:13    <sup>◊</sup> 1:25: Lom 8:2; Ya:i 2:12

**26** Ebema: la: nanisiwale! Kebe lumagite ebe a:ka:tuwa: ebe Godoko waloma:tadawama: eba gelo wiyasiya ebeno mena wadenomamo umina:no, ebe lumagi ebe a:ka:tuwa: ebe a:da: kemasigimene. Ebeno Godoko waloma:ta tanalo ebe sosowa keba kunula:ka: eba kunula, iyo, ebeno okoli magumulo Wade tanalote a:kitanamene! ☩ **27** Ebema: Godokono waloma:tadawanomono tanalo keba kunula:ka:? Ebete nigologolo gudi ega:walo amoleamole kamiyale ebakobako inamabua: epo ibino mibomibo magumulo wadenomamo walubilina, ega:walo ebete me opolo eba okolinalo kubakuba tanalo kosiyodilolena:, ma kunu ebete ebeno tepo magumu ukulate walo daleyama: a:ka:midimene. Nanitabola, Godote ebako lumagi duimene ebe ebeno nani waloma:tadawama: keka:imene.

## 2

### *Inamabu Bilibila:gopi Kapiyatamo Wadewade Tanalo Ako-osiyodilola:la:*

**1** Naimano ekakiala:, la: aimano Kawodawa Ya:su Kelisoko nanitabokobi midipilata ega:walo ebe Godokono elawo alo magumulo dokolina ebe Kawodawala, ebema: la:le epo unu nikapiamo ulamea:no ma kunu lumagi idi atepalo lumagi idi ebo akolawa:la:. ☩ **2** Ebe mabuma: kebe tetelo inamabu bilibila:godawa idite ebeno wadewade kaliku pupuliote ega:walo wiya kawonomo lini inamabu ebeno kotamo pulite la:imano sosi aladabuti tanalamo da:pemene, ebene ebe atu tetelo inamabua:dawa idite la:

---

✩ **1:26:** Oale 141:3    ✩ **2:1:** Ali 10:34; Ya:i 2:9

magumamo da:ka:pemene, la:imano woki ibi netewapiatamo keba kunu na:kitanamene?  
**3** Wadewade kaliku pupulite da:pemene, la:ebe lumagi kawonomamo eba malagidilolo ebetamo ma kunu ba:kegelaema, “A:ma: niyata, me dopo apuno okoli baiamo nokoliya?” Wiyasiya inamabua:dawa da:pemene, la:ebe nilakapolo malagidiloa:no ebetamo ma kunu ba:kegelaema, “Okoli bai idi kitana: modobola a:ma: iyabailo gito nutita?” **4** Eiye! La:mako osiyodilo tanalodo la:imano tepo magumuno kuba woki awokalilamenakomata, mabu la:imano tepo magumulo la: inamabu bilibila:gopi wadewadepima: eba gelalo, inamabua:pi sosowama: midililo ibi nilakapolo kemalagidilola:wena:!

**5** O naimano wadewade ekakiala:, modobola la: me tabo wadenomamo nolowiala!: Godote inamabua:pi nanitabolo uwatiya, iba:te me opolo eba ilukulinalo nanitabokobi midi magumulo kawokawopima: keda:onama:. Nanitabola, walone iba:te Godokono Kawo Elawodawano Duliymololo da:pola:na ebe inamabu bilibili kuwatema:na:, mabu Godote nani tabonomo iyalo a:kiyawaiya ebe Duliymolono wadewade tanalo ebe nilakapolo demalagidilona ebe epatamo kikalaema:. **◊**

**6** Wiyasiya numa:la:, la: ebako inamabua:pi nilakapolo kemalagidilola:wena:, inamabu bilibila:gopi kapiya malagidilolenamata. Eiye! La:imano kuba woki beda:kawonomola:ka!: Tete epetapilo ebe atu inamabu bilibila:gopiate la:

nanitabokobi midipiatamo kawokawo temeteme  
eba ikalamelo gabamanino tabo anagiyamida  
baiamo la: ebo magatalenakota.<sup>7</sup> Iyo, ibi epetapi  
Ya:su Kelisoko demalogonaka ebe nanitabokobi  
midia:pila, ebema: Ya:sukono wade mailo ebete  
la: kowalubilitama: dikalametiyalala, iba:te ebe  
mailo kubama: gelana.

<sup>8</sup> Numa:la:, Kowo Elawodawa Godote ebeno  
kawo totomu tabonomo ebeno Bukalo ma  
kunu awokalimina, “A:ma: a:ka:tuwa: a:ma:  
demalagidilawena, eba kunu a:ma: niyakabolo  
dilukulina ebe epo nilakapolo nemalagidilolena,”  
ebema: modobola la: me tabamo nanitabolo  
na:tudila:onala:. <sup>9</sup> Wiyasiya la: tudila:oa:no,  
ma kunu la: epo unu nikapiamo ulamelo  
inamabua:dawa idi sosowama: mida:wete, ebene  
ebe atepawete inamabu bilibila:godawa idi  
delawa:ema, la: kawo kuba kosiyodilomamota.  
Eiye! Godokono kawo totomunomo adikanale  
mabuma: kuba wiyate la:tamo nanitabolo  
ka:pemene, <sup>10</sup> mabu kebe lumagite Godokono  
totomu tabo bilibilinomo eba uwatelo idi  
kapiya dadikanalemene, ebe tetelo ebete  
totomu tabo bilibilinomo dowakalamina ebako  
dubuma: keda:mene. Iyo, kapuya totomu  
tabo adikanaledawa ega:walo totomu tabo  
bilibilinomo wakalamidawa ibino tanalo ebe  
kapiyalala, mabu ibi netewapiate kapuya gabodo  
ibino kuba wiya Godogodone kuwatema:na:. <sup>11</sup>

<sup>11</sup> Ebema: numa:la:, Kawodawa Godote totomu  
tabo ma kunu giya, “A:ma: dubu idino kamiyale  
pilolo akolawa:la:,” ega:walo me atu Kawodawate

---

<sup>8</sup> **2:8:** Ma:t 19:19; Gal 5:14    <sup>9</sup> **2:9:** Totomu 1:17    <sup>10</sup> **2:10:** Ma:t  
5:19

walo na:kegiya, “A:ma: lumagi idi akoanakapuma:la:.” Ebene kebe tetelo a:ma: dopo totomu tabo eba lawelo wiyasiya a:ma: toawete lumagi idi gito dananakapuma:emene, a:imano tanalote keba kunu na:kitanamene? A:ma: dopo totomu tabo adikanalea:no, ebe mabuma: Godote a:ma:tamo ba:kekakalamene? Ao, ebete kuba wiya a:ma:tamo nanitabolo kikaema:ta, mabu a:ma: ebeno totomu tabo idi adikanala:ta! <sup>✳</sup>

<sup>12</sup> La: wadenomamo nolowiala:, Godokono kawo totomu tabonomo ebe nilakapo awokalimi totomu tabola, ebe totomu tabote epono nanitabokobi midi magumulo ibi tutunomoma: midilina. Ebema: modobola la: la:imano tabo gela magumulo ega:walo osiyodilole tanalo magumulo ebe kawo totomu tabamo nanitabolo na:tudila:onala:, mabu walone Godokono Unu Duliymololo ebe kapiya totomute la:imano tanalo kanagiyamidalaema:ta.

<sup>✳ 13</sup> Nanitabola, ebe tetelo Godote nilakapoa: epatamo ebeno nilakapo awokalimia:no kuba wiya iba:tamo kikalaemene, wiyasiya nilakapo awokalimipiatamo ebete kuba wiya a:kikalaemene, ao, ebete ebeno nilakapo iba:tamo kawonomamo kawokalimene. <sup>✳</sup>

### *Godoko Nanitabokobi Midi Tanalo Ega:walo Wadewade Osiyodilole Tanalo Ebe Kapiyala*

<sup>14</sup> Naimano ekakiala:, kebe lumagite Godoko nanitabokobi midima: gelo wadewade tanalo osiyodilolea:no, ebeno tanalo keba kunula:ka:? Godote epono tanalo danagiyamidalaemene,

---

<sup>✳ 2:11:</sup> Maimi 20:13-14; Lom 13:9    <sup>✳ 2:12:</sup> Gal 6:2; Ya:i 1:25;

1Pit 2:16    <sup>✳ 2:13:</sup> Ma:t 5:7; 18:32-35

ebe tetelo ebete ebe lumagino nanitabokobi midi tanalo modoboma: ba:kegemene? Ao, ebako lumagino nanitabokobi midi tanalo ebe a:da: elemasigi tanalola, ebeno igilo mula: tanalote a:kitanamene. <sup>15</sup> Diyala la:imano nanitabokobi midipino taneba magumulo lumagi idite kalikua:noma: da:beda:nale, ega:walo nao inamabua:dawate da:ba:lutale. <sup>¤</sup>

<sup>16</sup> Ebene la: magumulo idite ebako nigologolo lumagi umite, ebe walubia:no ebetamo ma kunu degemene, “A:ma: Godokono kalakalago na:toa, ebe a:ka:tuwa: a:ma: kalikamo ega:walo baeamo kowalubima:ta,” ebe tabo walubi taboa:, kuba tabola. Ebema: kebe tetelo nanitabokobi mididawa idite inamabua:no dokolina, ebene a:ma:le ebe kalikamo ega:walo baeamo walubia:no, a:imano nanitabokobi midi tanalote keba kunu kitanale? <sup>17</sup> A:ma: wadenomamo nolowia, a:ma:le Godoko nanitabokobi midima: geawete wiyasiya wadewade tanalo osiyodilolea:no, a:imano nanitabokobi midi tanalo ebe a:ela.

<sup>18</sup> Wiyasiya la:imano nanitabokobi midipino taneba magumulo epetapiate negelana, “Lumagigodolo wadewade osiyodilole tanalate pola:na:no kuba:, mabu Godoko nanitabokobi midi tanalo ebe tepo magumuno osiyodilo tanalola, apa:mo osiyodilo tanaloa:.”

Ebema: na Ya:imesite ibino tabo eba wiyalo negemo, “La:le wadewade tanalo dosiyodilola:ema nale la:imano nanitabokobi midi tanalo ebo kiyatawamamo, wiyasiya la:le osiyodilolea:no na a:kiyatwamamo. Numa:la:,

naimano tanalo ma kunula, epetapiate naimano nanitabokobi midi tanalo kiyatawaoma: nale wadewade tanalo ebema: osiyodilolenakomo.” <sup>✡</sup>

<sup>19</sup> Wiyasiya la: epetapiate kegelamamota, “Ale Godoko kapiya nanitabokobi na:midinama:, me kawo tanalola, aimano apa:mo osiyodilole tanaloa:.”

Na wiyasiya kegemamo, “Iyo, Godoko kapiya ebe Kawodawala, Saitanakono kubakuba uliyana atumu ebe tanalo iyatawala. Ebema: iba:te ebe tanalo nanitabokobi eba midilo Godokono elawoma: anakamiolo na:toletoleona, wiyasiya numa:la:, iba:te ibino kuba osiyodilole tanalo miyapa:no wadewade tanalo kosiyodilolenakoa:. Ebema: la: na:kemalagidilawitama Godote ibino tole tanaloma: iba:tamo kekalakalamene? Ao, ibino wadewade tanalo osiyodilolea: mabuma: ebete iba:tamo kuba wiya nanitabolo kikalaemene!”

<sup>20</sup> Eiye, a:ma: wadewade tanalo osiyodilolea: lumagima: deda:wena, a:ma: daedale lumagilata! A:ma: numa:, Godokono Buka apuno tabo idite a ma kunu iyatuamena, kebe lumagite Godoko nanitabokobi midima: gelo wiyasiya wadewade tanalo osiyodilolea:no, ebe lumagino nanitabokobi midi tanalo ebe a:da: elemasigi tanalola. <sup>21</sup> Iyo, a:ma: aimano ewono A:ibalayamakono tanalo nemalagidila. Ebete Godoko nanitabokobi eba midilo, ebeno nanitabokobi midi tanalote ebeno osiyodilo tanalodo ma kunu awokaliya, ebete Godoko watidilono nokola patapata unamo ebeno

gudu Aisa:keko adilatite Godotamo nanitabolo ikamiya, iyo, ebeno wade osiyodilo tanalodo Godote ebe tuputupudawa idima: ebo ka:miya. <sup>21</sup>  
<sup>22</sup> Ebema: ale me tanalo uima:, A:ibalayamakono nanitabokobi midi tanalo ega:walo ebeno osiyodilo tanalo kapiyanomoma: eba eda:lo, ebeno nanitabokobi midi tanalote ebeno osiyodilo tanalodo modobonomoma: ebo eda:miya. <sup>23</sup> Iyo, me tanalote A:ibalayamatamo pemaigiya, Godote ebeno Bukalo dopamo degiya ebe tabote nanitaboma: keda:ma:, mabu ebeno Bukalo tabo ma kunu itana, “A:ibalayamate Godoko nanitabokobi da:midiya, ebema: Godote ebe tuputupudawama: ebo giya.” Iyo, nanitabola, A:ibalayamakono nanitabokobi midi mabuma: Godote ebe ebeno wade namutudawama: ka:miya. <sup>24</sup> Ebema: modobola a:ma: me kawo tanalo wadenomamo nelawa:, a:ma: Godoko nanitabokobi midilo wadewade tanalo nosiyodilolenakiye, mabu Godote wadewade osiyodilole tanalo a:ma:godolo dulaemene ebete a:ma: tuputupudawama: keka:ima:ta. Wiyasiya a:ma: nanitabokobi midi magumulo wadewade tanalo osiyodilolea:no, a:imano nanitabokobi midi tanalo ebe a:da: elemasigi tanalola, Godote a:ma: tuputupudawama: a:keka:mitamene.

<sup>25</sup> Ega:walo Godokono Bukate nanitabokobi mididawa idino tanalo kawokalimina, ebeno mailo ebe La:iya:batela. Ebe kamiyalete dopamo Godoko nanitabokobi midia: tetelo dubu bili-bili kamiyalema: eda:nami, wiysiya Isalaela epate ebeno Ka:inane opo laema: da:pemaimi, <sup>26</sup>

---

<sup>21</sup> 2:21: W Mabu 22:9-12    <sup>22</sup> 2:22: Yu Epo 11:17-18    <sup>23</sup> 2:23: W Mabu 15:6; Ais 41:8

ebe tetelo ebete ibino Godoko nanitabokobi midite ibi ma kunu walubiliya. Isalaela dubu netewate opo umioma: diya gabodo ebetamo da:pemaimiya, La:iya:bate ibi Ka:inane opo gaba-mani dubatamo kikalamiya:, ebete wiyasiya ibi iya gabodo gito aliboliya gabamani dubate ibi anakapulamekapoma:. Nanitabola, mabu La:iya:bate me wade tanalo dosiyodiliya, ebe mabuma: Godote ebe tuputupudawa idima: ebo ka:miya. <sup>◇</sup>

**26** Ebema: naimano iyatulame tabono magumu kawokalima: uli tabo idi ma kunu itana. Lumagite da:emene ebe tetelo ebeno uliyanate ebeno apene gito ka:nemaigamene, walo ebe a:e apelo a:kokolinamene. Ebema: nanitabola, lumagino nanitabokobi midi tanalo eba kunula, ebegodolo wadewade osiyodilole tanalate pola:na:no, epetapiate ebo kiyatawaoma:na: ebeno nanitabokobi midi tanalo iyalo a:i.

### 3

#### *Nanitabokobi Midipiate Ibino Iyaiya Tabo Kiyawao Tanalo Wadenomamo Nulamenama:na:*

**1** Naimano nanitabokobi midipi ekakiala:, la:imano sosi taneba magumulo kapiyakapiyano-mate iyatulamepima: neda:iyala:, mabu la: iyatawalata a piyate Godokono tabo iyatulamepima: deda:onama:, walone ebete aimano tabo kiyawao tanalo ega:walo osiyodilole tanalo kawonomamo kanagilameleaemene,

---

<sup>◇</sup> **2:25:** Yos 2:1-21; Yu Epo 11:31

wiyasiya ebete nanitabokobi midipi epetapino tanalo eba kunu akanagilamelelaemene.

<sup>2</sup> Nanitabola, tete epetapilo a nanitabokobi midipi bilibilinomate Godokono nanitabo gabon anaetoamidanakoma:. Wiyasiya numa:la:, a magumulo kebe lumagite ebeno tabo kiyawao tanalo bilibilinomo wadenomamo dulamena, ma kunu ebeno menate tabo kapiya idi kubanu gea:no, ebe lumagino osiyodilole magumulo kuba idite atumu a:kitanamene, iyo, ebete ebeno apeno iyaiya osiyodilole tanalo bilibilinomo wadenomamo ulamena kuba idi osiyodilokapoma:. <sup>3</sup> Ebema: modobola la: me uli tabo wadenomamo nemalagidilala:, oso-goeo namutudawate ebeno tabamo ale iyatite, ebene ebete oso-goeo unamo eba okolilo ebe da:peso ala:mo oso-goeo nanitabo gabodo ebo katamene. <sup>4</sup> Ega:walo uli tabo idi ma kunula, awate kewa: kolomono kawo palai pe kawonomomo eba attatalo, pe atadawate atumu walege da:pesamo ebe pe ebeno ubi gabodo gito katamene.

<sup>5</sup> Ebema: lumagino mena ebe atumula. Ebe mena lumagino ape kawonomomo magumulo ditana ebe apeno ape apu da:pesola, wiysiya ebe a:ka:tuwa: ubi diyatimene menate lumagi kuba gabamo ebo kemagatamene. Iyo, ebete amama tabo kiyawao tanalodo kawokawo tanalo osiyodilolema: degemene, ebete eba kunu ebeno igilo kawonomomo ka:na:kubaimene, ela mena da:pesote kawonomoma: eda:te kawokawo kewate delamota:ona ebe inamabu keba kunu kenalenakole eba kunu. <sup>6</sup> Iyo, nanitabola, lumagino mena ebe ela mena keba kunula:ka: eba

kunula, mabu menate lumagino apelo da:peso inamabuma: eda:na, wiysiya ebeno kuba tabo kiyawao tanalate ebe lumagino ape kawonomo daleyakobi midite ebeno okoli tanalono tanalo bilibilinomo gito ka:kubailaema:na:. Ebema: numala:, menano elate Saitanakono Ela Opone pemaiganako, iyo, mena ebe Kubadawano ubi tanalamo tuduwatanako. <sup>◊</sup>

<sup>7</sup> Nanitabola, agowamo wapata:lame inamabu ega:walo tepamo wapata:lame inamabu, obo magumulo digilona ebe inamabu ega:walo olaola, epate ebe iyaiya inamabu bilibilinomo gelebadikobi midili iyatawala, <sup>8</sup> wiysiya lumagite ebeno mena gelebadikobi midima: modoboas:. Gabo kitana: mabu menate kubanomoma: eba eda:lo, ebeno kuba tabo kiyawao tanalate epo epetapi anakapulaema: wagelena, ebe elawo kalu keba kunula:ka: eba kunula. <sup>◊</sup>

<sup>9-10</sup> Ebema: naimano nanitabokobi midipi ekakiala:, modobola la: me tanalo wadenomamo nemalagidilala:. Tete epetapilo a nanitabokobi midipiate aimano menamo aimano Kawodawa Nabiwi Godoko emoionakoma:, ebene tete epetapilo ale epo epetapiatamo dowaote aimano tabamo ibi ebo kubailamenakoma:. Numa:la:, Godote ebe epo ebeno ololamo osiyodilolete ebeno gudima: ka:la:mina, ebema: moio tabo ega:walo malato tabo atu lumagino tabone da:pemaimioma:na: ebe tanalo kawo kubanomoma: keda:mene! Eiye, ebako kubate a magumulo akomaigala!: <sup>11-12</sup> O naimano

---

<sup>◊</sup> **3:6:** Ma:t 12:36-37; 15:11,18-19    <sup>◊</sup> **3:8:** Lom 3:13

ekakiala:, la: iyatawalata, sipolo da:imi kewane epate boga:me da:imi ketapinakoa:, ega:walo siwila da:imi kewalo atumu sipolo da:imita ka:nolonakoa:. Eba kunu epate wade gola obo guline kuba solu obo kiyaponakoa:, iba:te wiyasiya wade obonomo iyaponaka, iyo, nanitabola, soluagono obo gulite wade gola obo epatamo ikalaema: modobo:a:.

### *Godokono Nanitabo Mulo Tanalo*

<sup>13</sup> Ebema: la:imano nanitabokobi midipino taneba magumulo mulo wokiagodawa idi ba:ka:lutale? Modobola ebako dawate tuputupu okoli tanalodo ebeno mulo ma kunu na-wokalimene, ebete amama:no wadewade tanalo kapiya bosiyodilolenakomene. <sup>14</sup> Wiyasiya la: la:imano tepo magumulo epetapino inamabuma: iba:tamo da:dowawenama, ega:walo amama magumulo la: a:ka:tuwa: la: dowadipalatela:wenama, la: nanisiwale! La:imano amama tanalono osiyodilole magumudo la: Godokono nanitabo gabon a:da: gaboma: gelanamata, ebema: modobola la: ebe amama tanalo natepala:. <sup>15</sup> Eiye, la:godolo ditana ebe amama woki Godokono Unu Dulyiomolone ka:pena!: Ao, ebako woki me opono mulo wokino tanalola, ebe a:da: mulo tanalote Saitanagodone eba penalo Godokono nanitabo mulo tanalago ebo pegowelaonako. <sup>16</sup> Ebema: piyate epetapino inamabuma: iba:tamo da:dowaona, ega:walo piyate amama magumulo ibi a:ka:tuwa: ibi kapiya demalagidilolena, iba:te apamineateui magumulo iyaiya utitatate iyaiya kuba tanalo bilibilinomo ebo osiyodilolenaka.

<sup>17</sup> Wiyasiya Godogodone da:pena ebe mulo tanalono osiyodilole tanalo eba kunua:, mabu ebno nanitabo mulote epagodolo ditana, iba:te iyaiya kuba daleya tanalo kosiyodilolenakoa:. Ebe epate milolo eba ilukulinalo apaminateui tanalo kiyatawaonakoa;, wiyasiya ibi magumulo idite idi kawonomamo nilakapoimilo wadewade tanalo ebo osiyodilolenaka. Ebene iba:te epo unu nikapiamo ulamea:no ma kunu lumagi idi atepate lumagi idi ebo kelawenakoa:, ega:walo iba:godolo mena netewa tanalote kitana:. <sup>18</sup> Nanitabola, piyate mako milo ilukuli tanalo epetapiatamo dikalamena, ibi wadewade kikopu damelamo damiona ebe wokopi keba kunula:ka: eba kunula, mabu ibino woko osiyodilo magumulo wadewade nao inamabunomate nanitabolo ka:pemaimioma:na:.

◊

## 4

### *Me Opono Iyaiya Tanalo Kawonomamo Malagidilole Tanalo*

<sup>1</sup> Ebema: la: nanitabokobi midipi magumulo gowelao tanalo ega:walo apaminateui tanalo kebene ka:pelamenakole? Iyo, ebe tanalate la:imano kateneno kubakuba ubi tanalodo pemaimionaka, mabu ebako ubi tanalate la:imano tepo magumulo wadewade wokino tanalago gowelaona. ◊ <sup>2</sup> Eba kunu la:le epetaipino inamabu uwatema: wagelenamata, wiyasiya uwate gabu umia:no ebema: la:le

---

◊ **3:18:** Ma:t 5:9; Yu Epo 12:11    ◊ **4:1:** Lom 7:23

la:imano tabamo ibi anakapulamenakomata. Ega:walo la: kawokawo inamabu uwatema: ubi kawonomola, wiyasiya la:godolo pola:na:no ebema: la:le eba apaminateuilo kubanomamo ebo gowelaonakomata. Eiye! Mabu keleka: la:le la:imano inamabu epetapi modobolo kuwata:wena:?<sup>3</sup> Mabu la:le Godoko la:imano modobo:a: tanaloma: nanitabo gabodo ka:toweoma:wenakoa:. <sup>3</sup> Ebema: numa:la:, kebe tetelo la:le inamabu idima: Godoko da:toweoma:wenakoma, ebe tetelo la:imano tepo magumuno woki tuputupulo ka:pola:na: mabu la: ubila ebe inamabu lawa:wete la: a:ka:tuwa: la: kekalakalailama:ema:. Iyo, la:le Godoko kekalakalaima:ema: woki kiyata:wena:, ebema: ebe ubia:nola inamabu idi la:tamo ikalaema:.

<sup>4</sup> Eiye, la: nanitabokobi midia: epo keba kunula:ka: eba kunulata! La: iyatawala:ka:, kebe lumagite me opono iyaiya tanalo kawonomamo demalagidilolena ebete Godago goweladawama: eda:na? Iyo, nanitabola, potele me opono inamabu ega:walo iyaiya amama tanalo uwatema: dowagelena, ebe Godago goweladawala. <sup>5</sup> Ebema: numa:la:, Godokono Bukalo tabote ma kunu itana, “Godoko ubi kawonomola ebeno Uliyanate a:ka:tuwa: aimano tepo magumulo kokolinama:, ebema: ebete aimano kubakuba wokino tanalago elawonomamo gowelaonako.” Iyo, la: iyatawalata me Buka tabote nanitabonomoma: eba eda:nalo,<sup>6</sup> ebeno Bukalo me tabo idite atumu ba:kitana, “Piyate damamaona Godote iba:go na:gowelaona,

---

<sup>3</sup> 4:4: Lom 8:7; 1Yon 2:15

wiyasiya piyate ibi a:ka:tuwa: ibi opamo dalomona,  
ebete iba:tamo ebano kawo nilakapo awokalimi-nako.”

Kalakala kawonomola, Godote ebano nilakapo atamo eba kunu awokalimina! <sup>✳</sup>

<sup>7</sup> Ebema: modobola la: a:ka:tuwa: la: Godotamo ikameawete Saitanatamo elawonomoma: neda:onala:, mabu la:le eba kunu dowagela:ema, Saitanate la: kuba gabamo wabuga:tale magumune la: miyapatate iyabaiamo samamo kalaula:mene. <sup>✳</sup> <sup>8</sup> Nanitabola, kebe tetelo la: Godoko niyakabamo da:pelama:ema, ebe atu tetelo ebete la:tamo pemaigate la: kalakalago ka:puwatemala:ta. Ebema: la: piyate iyaiya kuba tanalo dosiyodilola:wенама, modobola la: la:imano daleyя koto ukulaola:wete kubakuba tanalo walo ako-osiyodilola:la:. Ega:walo la: piyate Godoko ega:walo me opono tanalo atu tetelo waloma:talema: dowagela:wенама, modobola la: la:imano tepo magumuno kubakuba woki wadekobi midila:wete, <sup>✳</sup> <sup>9</sup> ebene la:imano kuba mabuma: modobola la:le tepo temetemema: eda:wete nima:la:. Iyo, modobola la: la:imano kalakala tanalo atepawete tepo magumuno ii tanalo nelawiyala:, ebene la:imano kalakala tanalote wiyasiya mibomiboma: neda:mene. <sup>10</sup> Ebema: nanitabola, la: Godokono ololo apulo la: a:ka:tuwa: la: opamo eba alomolo, ebete wiyasiya la: unamo kowadipalatelema:ta.

<sup>✳</sup>

---

<sup>✳</sup> **4:6:** Mulo Tabo 3:34; 1Pit 5:5    <sup>✳</sup> **4:7:** Epe 6:12    <sup>✳</sup> **4:8:** Sek 1:3; Ma:l 3:7; Ais 1:16    <sup>✳</sup> **4:10:** Yauba 5:11; 1Pit 5:6

*Nanitabokobi Mididawa Idino Tanalo Kubama:  
Akogeala:*

<sup>11</sup> Naimano ekakiala:, me tanalo idila. La:imano nanitabokobi midipino taneba magumulo idite idino tanalo kubama: akogeala:, mabu kebe tetelo a:ma: nanitabokobi mididawa idino tanalo kubama: degeaemene, ebe tetelo a:ma: Godokono kawo nilakapo totomu tabonomo kadikanalema:ta. Numa:la:, Godote ebno totomu tabamo a:ma: ananata a:ma:le a:imano nanitabokobi midi ekawi nilakapolo kemalagidilawenama:, ebema: kebe tetelo a:ma: a:imano ekawi kubama: degeaemene, ebe tetelo a:ma: Godokono totomu tabo atumu kubama: ka:kegema:ta. <sup>12</sup> Eiye, a:ma: kawo lumagia!: A:ma:tamo elawo potele kikametana lumagi idino tanalo kanagiyamidama:ema:? Godoko kapiya ebe totomu tabo osiyodiloledawala, ega:walo ebe kapiya ebe epono tanalo anagilamelelamedawala, ebema: me Kawodawa kapiyate modobola epono iyaiya ilukuli tanalo eba anagilamelelameloo idawano igilo mula:mete idawatamo kuba wiya kikaemene. <sup>☆</sup>

*Lumagite Ebno Osiyodilole Tanaloma: Amama  
Tabo Akokiyawaoala:*

<sup>13</sup> Ega:walo me tanalo idila. La: epetapi ma kunu gelanakomata, “Ka:lo adimolo o dumutu egelalo na kawo duliyomolamo tote, ebolo nale kapiya ulamamo eba nokolilo bisnisi woko nosiyodilote mani kawokawonomo ka:nuwatemamo.” <sup>☆</sup> <sup>14</sup> Eiye! A:ma: iyatawa: dumutu a:ma:tamo beda: tanalote

<sup>☆</sup> **4:12:** Lom 2:1; 14:4    <sup>☆</sup> **4:13:** Luk 12:18-20

na:kemaigamene. A:ma: opo lumagilata, ebema: a:imano igilo ebe tema keba kunula:ka: eba kunula, lumagite tete da:pesolo umite a:ka:tuwa: samonomomo ebo kolopoligomene.

⊕ 15 Ebema: modobola a:ma:le amama tabo kiyawao atepawete ma kunu negiye, “Godote elawo natamo dikanaemene, na dumutu igilolo eba lutalo nale ebeno ubi tanalo ebo kosiyodilomamo.” 16 Wiyasiya la: epetapi mako wadewade tabo kegelawenakoa:, la: a:ka:tuwa: la: amamalatelenamata, ebema: Godote la:imano amama tabo gela tanaloma: kekakalakalana:. 17 Iyo, me tanalo nanitabola, kebe lumagite tuputupu osiyodilo tanalo eba iyatawalo wiyasiya ebe tanalamo tuduwata:no, ebeno osiyodiloa: tanalodo ebete Godokono pukala ebo kadikanalemene. ⊕

## 5

*Inamabu Bilibila:gopiate Ibino Kuba  
Osiyodilole Tanalo Miyapate Godotamo  
Nolobila:oma:na:*

1 Ebema: inamabu bilibila:gopiala:, la: naimano tabo wadenomamo nolowiala:. Modobola la: me tetelo imi nowagilima:la:, mabu kawokawo temetema:te la:tamo na:pelama:, 2 iyo, tete tatalila la:imano inamabu bilibili tanalate ka:kubakubaoma:na:. Ebe tetelo la:imano pupuliono inamabu nopaiate naote, ⊕ 3 ebene la:imano wadewade disi damelate eba uwatelo nonokama: ebo keda:oma:na:.

⊕ 4:14: Mulo Tabo 27:1; Oale 39:5,11 ⊕ 4:17: Luk 12:47

⊕ 5:2: Mat 6:19

Ebema: nanitabola, Godote epono kuba danagilamelelaemene, ebe Kawo Egelalo ebe nonoka inamabuate la:imano kuba osiyodilole tanalo ega:walo kuba wokino tanalo kawokalilaema:na:. Numa:la:, me opono uwomu tetete eba penapelo, la:imano inamabu iyalo a:dogodogoilamenaimata, wiyasiya tete tatalila la:imano kalakala tanalote kolopoligomene, iyo, la:imano nonoka inamabuate la:imano ape eba kubailamelo la:imano kalakalate ebo kolopoligomene, elawo elanomote namo tuwaenomoma: keba kunu ka:midinakole eba kunu.

<sup>4</sup> Nanitabola, la:imano kuba tanalo ma kunu itana. La:imano kawokawo bisnisi magumulo piyate la:imano olowameno pali inamabu detapiolametanaka, la:le iba:tamo wade wiya kikalama:wenakoa:, ebema: iba:te ibino temeteme magumulo kawonomamo imina. Eiye, Elawodawa Godote ebe imi tanalo iyalo iyatawi! <sup>5</sup> Ebema: numa:la:, la: me opolo inamabu bilibilipima: eba eda:wenalo la: a:ka:tuwa: la:imano kateneno ubilo la: ekalakalailamenakomata, iyo, la: wadewade bae eba naonalo gadigadinomoma: iyalo eda:imata. Ebema: gadigadi kau-goeogoeo keba kunula:ka: la: eba kunula, tete tatalila Namutudawate la: anakapulaema: ka:pemene. <sup>6</sup> Ega:walo me tanalo idila. Tete epetapilo la:le tuputupu epatamo dowawete, ebene la:le ibi gabamaniatamo gito magatalenakomata iba:te iba:tamo a:e wiya kikalaema:. Eiye! Ebe epate

---

<sup>◇</sup> 5:4: Totomu 24:14-15 <sup>◇</sup> 5:5: Luk 16:25

la:tamo kuba idi kosiyodilonakoa:, wiyasiya ebe gabodo la:le ibi gito anakapulamenakomata!

*Nanitabokobi Midi Magumulo Kodakodal  
Lamota:ona Tanalo*

<sup>7</sup> Ebema: naimano ekakiala:, la:imano nanitabokobi midi magumulo kodakodal nelamota:onala: Kawodawa Ya:sukono pe teta:mo. Modobola la: pali osiyodilodawano tanalo nemalagidilala:, ebete pali inamabu amiote wade pali inamabu nao tete ebo kemakopelenamene. Ma kunu dopo sagana tetelo ulamate downonakomene ega:walo uwomu saganalo walo da:kowonakomene, damelate wade gibama: eba eda:lo ebeno pali inamabuate wadenomamo ebo kapepeoma:na:.

❖ <sup>8</sup> Ebema: la: atumu Ya:sukono pe tanalo makopelema: ubia:noma: eda:oa:no kodakodal nelamota:onala:, mabu ebeno pe tete netatali! ❖

<sup>9</sup> Ebema: naimano ekakiala:, la: magumulo idite lumagi idino tanaloma: ubia: tabo akogeala:, mabu diyala, Godote a:imano tamedawano okoli tanalo modoboma: eba gelo wiyasiya a:ma: kubadawama: da:begemene. Iyo, ebe Kawodawate na:pe a bilibilinomono iyaiya tanalo kapanagilameleaema:!

<sup>10</sup> Ega:walo naimano ekakiala:, modobola la:le iyalo tetelo da:pemaimiya ebe Godokono woki awokalimpino tanalo nemalagidilala:. Iba:te Godokono woko eba osiyodilonalo kawokawo temeteme duwatenakiya, wiyasiya iba:te nanitabokobi midi magumulo kodakodal

---

❖ 5:7: Totomu 11:14; Yel 5:24    ❖ 5:8: Lom 13:11-12; 1Pit 4:7

lamota:onanakiya, ebema: iba:te keba  
 kunu kilukulinami, modobola la: eba kunu  
 nilukulinala:. <sup>11</sup> Numa:la:, a nanitabokobi  
 midipiate ebako wokopi eba malagidilolelo  
 ma kunu gelanakoma:, “Ibino kodakodalo  
 lamota:ona mabuma: Godokono kalakala  
 tanalote iba:godo nanitabolo nitanami!”  
 Ebema: modobola la: nanitabokobi mididawa  
 idi Yaubakono tanalo atumu na:kemalagidilala:  
 Kawo olalatinomo tanalote ebetamo demaigiya,  
 ebe tetelo ebete nanitabokobi midi magumulo  
 kodakodalo utinami, ebema: Kawodawa Godote  
 ebe walubite olalati magumune ebeno igilo  
 a:mula:miya. Kalakala kawonomola, Godoko ebe  
 kawo nilakapodawanomola. <sup>◊</sup>

### *Nani Tabonomo Ge Tanalo*

<sup>12</sup> Ebema: naimano nanitabokobi midipi  
 ekakiala:, me tanalo idi ebe kawo tanalonomola.  
 La:le epetapiatamo nani tabonomo gelama:  
 dowagela:ema, olowiopiate la:imano tabo  
 nanitabokobi ka:midima: la:le Godokono Unu  
 Dulyiomolono mailo akoka:miala: ega:walo  
 me opono mailo atumu akoka:miala:. Ebema:  
 nanitabokobi mididawa, modobola a:ma:  
 wiyasiya a:imano tabo kiyawao magumulo  
 inamabu idino mailo ka:mia:no tabo nanitabolo  
 ma kunu negiye, “Iyo, na kosiyodilomamo,”  
 ega:walo kebe tetelo a:ma: tanalo idi osiyodiloma:  
 modobo:a:noma: deda:emene, modobola a:ma:  
 nani tabo idi ma kunu negiye, “Ao, na  
 a:kosiyodilomo.” Eiye! Epetaipate a:ma:  
 nanitabokobi ka:miditama: a:ma:le a:imano tabo

---

<sup>◊</sup> **5:11:** Maimi 34:6; Yauba 1:21-22; 2:10; Oale 103:8

elawokobi midima: tabo idi akogeala:, mabu ebako tabo kiyawao tanaloma: Godote kuba wiya a:ma:tamo kapalibomene.  $\diamond$

### *Godotamo Towetowe Tabo Ge Tanalo*

13 Ebema: la: magumulo kebe lumagite temeteme epetapi magumulo dokolina, modobola ebete towetowe tabo Godotamo negemene. Ega:walo kebe lumagite kalakala magumulo dokolina, modobola ebete Godoko amamate oale nalapiomene. 14 Ega:walo kebe lumagi temetemete dumina, modobola ebete sosi watowatopi ka:la:mite, ebene iba:te pelamete Kawodawa Ya:sukono mailamo olibi kikopuno iamo ebeno wato kali pabutimite Godotamo ebe ebo nadipatema:na:.  $\diamond$  15 Ebema: iba:te Godoko nanitabokobi eba midilo, ebete ibino towetowe tabo olowite temetema:go lumagi wadekobi ebo ka:midimene, ega:walo diyala, ebe temetemete ebe lumagino kuba osiyodilole tanalodo ebetamo da: a:pile, ebene Godote ebe tanalo iyatawate ebe atu tetelo ebeno kuba egebolemete ka:dodolomatilimene.  $\diamond$  16 Ebema: modobola la: magumulo idite ebeno kuba osiyodilole tanalo kawokalilame, idite ebeno kuba osiyodilole tanalo kawokalilame, eba kunu nowagelenala:, ebene la: magumulo idite idi Godotamo nadipatenakiyala:, ebete la:imano kuba egebolelametate la:imano apeno iyaiya temeteme tanalo balamo kalomolametama: Nanitabola, kapiya tuputupudawano towetowe

---

$\diamond$  5:12: Ma:t 5:34-37  $\diamond$  5:14: Mak 6:13  $\diamond$  5:15: Mak 16:18

tabo ge magumudo Godoko ebe modobola kawokawo anoano tanalo osiyodilolema:.

<sup>17</sup> Numa:la:, Godokono woki awokalimidawa Elayako ebe opo lumagila, a keba kunula:ka: ebe ebako lumagila. Wiyasiya ebe wade tuputupudawala, ebema: ulamate kolopoligoma: ebete Godotamo kawonomamomo da:towetowiya, Godote ebeno tabo nanitabolo olowiya, iyo, ebe tetene wagilimite ulamate tete geyageyanomolo kownakia:, ebe tete ebe netewa-kapiya ulama ega:walo sikisi sagana tetela. <sup>18</sup> Wiyasiya ulamate walo owoma: Elayate Godotamo towetowe tabo da:kegiya, Godote ebeno towetowe tabo walo kolowite ulama opamo ebo palibiya epono pali inamabuate walo kakapepeoma:. <sup>19</sup>

### *Lumagino Igilo Mula:me Tanalo*

<sup>19</sup> Ebema: naimano nanitabokobi midipi ekakiala:, naimano uwomu leta tabo ma kunula. La: magumulo idite Godokono nanitabo gabone iyabaiamo delegamene, modobola idite ebe walo na:kemagaemene. <sup>20</sup> Iyo, la: me kawo tanalo nemalagidilala:, kebe lumagite kuba osiyodilodawa umite ebeno kuba gabone Godokono nanitabo tanalamo walo da:kemagaemene, Godote ebe tuputupudawano osiyodilo tanalodo kubadawano igilo mula:mete ebeno iyaiya kuba osiyodilole tanalo ebo kegebolemene.

Me naimano tabo uwomula. Taula. <sup>21</sup>

---

<sup>17</sup> 5:17: 1Ela 17:1; 18:1    <sup>18</sup> 5:18: 1Ela 18:42-45    <sup>19</sup> 5:19: Gal 6:1    <sup>20</sup> 5:20: Mulo Tabo 10:12; 1Pit 4:8

**GODOKONO WADE TABO  
The New Testament in the Fly River dialect of the  
Tabo language of Papua New Guinea  
Nupela Testamen long tokples Tabo (Fly River) long  
Niugini**

Copyright © 2006 The Bible Society of Papua New Guinea

Language: Tabo (Fly River) (Tabo)

Dialect: Fly River

Translation by: Wycliffe Bible Translators

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2012-10-23

---

PDF generated using Haiola and XeLaTeX on 11 Nov 2022 from source files  
dated 9 Oct 2020  
cbbd3ff2-0ca7-5896-b3fd-850bc0fd18b7